


73044

3




名山巖洞泉水古蹟卷之三

吳興歸安山泉慎家編選

校正 錄梓

南京

應天府



石頭山 在府西二里蜀漢諸葛亮云石頭虎踞是也唐朱存詩○五城樓堞各相望山水英靈宅帝王此地定由天造險古來長恃作金湯

聚寶山 在府南聚寶門外雨花臺側上多細碼礮石因名

牛首山 在府南三十里舊名牛頭山有二峯東西相對晉元帝初作宮殿王導指雙峯曰此天闕也故又名天闕山劉宋立郊壇於此梁武帝又於山下建寺山有石洞洞中有石鼓天欲雨則石鼓自鳴 高祖怪此山獨不北拱因而加杖之或誤傳乎蓋天地間萬山環列而江河四繞其中則堪輿也此牛負而載之首宜南向耳復訪識樺樸二木五山北本朝胡廣詩○曉從鑿輿出九關偶尋牛首共躋攀南唐古寺留碑在西竺高僧度錫還百尺巖龕過鳥上半空鐘鼓隔人間暫游已覺塵緣息到此方知佛窟閑

祖堂山 在府南四十里唐法容禪師得道於此為

南宗第一祖師故名

天開巖 在攝山棲霞寺之後去寺三里石多特立中有石壁相向其直如截殆非人力所至故以天開名其巖巖之左有張稚圭祖無擇諸公題字

茅山 在句容縣東南四十五里山形如句字初名

句曲山後因茅君得道於此更今名道書為第八洞

天第一福地山有三峯三茅君各占一峯謂之三茅

峯金陵志茅山與蜀岷峩相首尾蔣山實其脉之盡者

攝山 在府東北五十五里有草可以攝生故名

芝山 在溧水縣東南七十里上有李子洞泉出沸湧相去三百步名燕洞中有石燕遇雨則飛晴則還落為石廣可容數千人。

定山 在江浦縣北二十五里上有獅子峰下有達磨祖師宴坐岩及塔二處

鍾山仙洞 在鍾山上即道書第三十一洞天

石城洞 在石頭西嶺下臨大江當斬絕之處有洞戶真誥云此中有洞天也

八功德水 在鍾山東梁有胡僧曇隱寓錫于此乏水時有龍眉叟謂曰予山龍也措之無難俄而一泓

沸出宋曾極詩○數斛供厨替八珍穿松漱石瑩心神中涵百衲煙霞色不染齊梁歌舞塵

景陽井 在臺城內一名胭脂井陳後主與張麗華孔貴嬪投其中以避隋兵後人名為辱井唐陸龜蒙詩○古堞煙埋宮井樹陳主吳姬墮泉處舜沒蒼梧萬里雲却不聞將二妃去

湯泉 在湯山下劉宋江夏王義恭泉銘 秦都壯溫谷漢京麗湯泉炎德資遠液喧波起斯源

白乳泉 在攝山千佛嶺下昔人因伐木見石壁上刻隸書六大字曰白乳泉試茶亭

喜客泉 在茅山客至則湧出故名又有撫掌泉聞擊掌之聲則沸

香泉 在江浦縣西三十里舊名湯泉其泉有二相去百餘步南唐韓熙載記言其泉能蠲除疾疹

善泉池 在古臺城東一名九曲池梁昭明太子所鑿者中有亭榭洲島昭明泛舟池中嘗曰何必絲與

竹山水可忘情
白鷺洲 在府西南江中唐李白詩二水中分白鷺洲

躍馬澗 在府西南舊名落馬澗宋王安石詩○小

澗何年躍馬蹄白沙翠竹淨無泥石橋流水行人過

野路斜陽倦鳥啼朱雀航遙蕭寺遠赤烏塔近月臺
低風煙漠漠渾依舊欲醉春醪誰共携

投書渚 在府西南三十里晉殷羨為豫章守赴郡人多附書行至此以書擲水中祝曰沉者自沉浮者

自浮殷洪喬不作致書郵
古蹟

梅梁殿 在臺城內晉太元間謝安作新宮造殿欠一梁時有梅木流至石頭城下因取為梁殿成乃畫

梅花於上表瑞

玉燭殿 在臺城內劉宋孝武追陋前規更造正光
玉燭紫極諸殿內有含章殿即壽陽公主人日卧簷
下梅花點額處

閱江樓 在獅子山上本朝宋濂奉 勅撰記有云
金陵為帝王之州自六朝迄于南唐類皆偏據一方
無以應山川之王氣逮我 朝定鼎于茲始足以當
之京城之西北有獅子山自盧龍蜿蜒而來長江如
虹實蟠遶其下因地雄勝 詔建樓於巔與民同游
觀之樂

臨春閣 結綺閣 望仙閣 在臺城內俱陳後主

建後主自居臨春張麗華居結綺龔孔二貴嬪居望
仙並靚粧臨檻飄若飛仙有女學士袁大捨獻春樂
詞以諷之唐劉禹錫詩○臺城六代競豪華結綺臨
春事最奢萬戶千門成野草只綠一曲後庭花

此君亭 在舊華藏寺亭傍種竹王安石○誰憐直
節生來瘦自許高才老更剛

雨花臺 在府南三里據岡阜最高處梁武帝時有
雲光法師講經於此感天雨花劉潛夫詩○昔日講
師何處在高臺猶有雨花名

桃葉渡 在秦淮口晉王獻之愛妾名桃葉其妹曰

桃根獻之嘗臨此作詩歌以送之其詩曰○桃葉復
桃葉渡江不用楫但渡無所苦苦我自迎接後人因
以名渡楊脩詩○桃葉桃根柳岸頭獻之才調頗風
流相看不語橫波急艇子翻成送客愁。

夢筆驛

在治亭江淹嘗宿此夢人自稱郭璞謂曰

吾有筆在公處可見還淹探懷中五色筆一授之此
後為詩絕無美句

王安石宅

在鍾山安石晚年捨宅為寺即半山寺

也

謝公墩

在今朝天宮後晉太傅謝安與右軍王羲

之同登此王安石詩○我名公字偶相同我屋公墩

在眼中公去我來墩屬我不應墩姓尚隨公

烏衣巷

在府南晉王導謝安居此巷其子弟皆烏

衣因名巷口有朱雀橋唐劉禹錫詩○朱雀橋邊野

草花烏衣巷口夕陽斜舊時王謝堂前燕飛入尋常

百姓家

同泰寺石

在臺城內寺即梁武帝捨身處寺前有

醜石四各高二丈餘俗呼為三品石宋王安石詩○草

沒苔侵棄道周誤恩三品竟何酬國亡今日頑無耻

自謂當年不與謀

鳳陽府

萬歲山 在皇城北城垣經其上山之東西有二峰對峙東曰日精西曰月華

八公山 在壽州東北五里淝水之北淮水之南漢

淮南王安與其賓客八公俱登此山學仙今山有安

故臺及石上有人馬迹謂謝玄禦符堅陣淝水堅壁

見八公山上草木皆為旌旗狀秦師遂敗

第一山 在盱眙縣治東其下有石刻宋米芾書第

一山三大字芾詩云莫論衡霍衝星斗且看東南第

一山司馬光詩○都梁一別周星紀白首重來一夢

間來去渾無功可紀但栽桃李滿空山

龜山 在盱眙縣有二上龜山在縣治西南下龜山

在縣東北三十里相傳禹治水鎖渦水神巫支祁於

此山之足山西南上有絕壁下有重淵即其處唐宋

秦中李湯以牛五十引鎖出之鎖末有一青猿高五

丈許復拽牛沒水宋周知微回文詩○潮回暗浪雪

山傾遠浦漁舟釣日明橋對寺門松徑小檻當泉眼

石波清迢迢綠樹江天曉靄靄紅霞海日晴遙望四

山雲接水碧峰千點數帆輕

浮山 在盱眙縣西一百四十里北臨淮水一名臨

淮山山下有穴。去水一丈。淮水泛溢。其穴即高。水減。其穴還低。上有靈巖寺。名人多有題詠。

磬石山 在靈璧縣北七十里。山出磬石。朝廷用則取之。民間或有私取者。則無復磬聲。

水簾洞 在舊府城清流門外。相傳中有宋皇甫斌書水簾真洞四字。刻于石。石沒於水。深淺莫測。洞上有宮觀。

有宮觀

真珠泉 在壽州北三里。世傳淮南王煉丹之所。旱暵不竭。每聞人聲。則珠泉湧集。或呼為噉泉。

咄泉 在壽州東北一十里。其泉一。無波浪。若人至

其傍。大叫。即大湧。小叫。即小湧。咄之。則湧彌甚。一名

玄女泉

玻璃泉 在第一山崖下。有石龍虎口中噴水。注石

池中

古蹟

浮空亭 在浮山頂上。宋建。蘇軾詩。○人言此地是鰲宮。升降隨波。與海同共。坐船中。那得見乾坤。浮水水浮空。

觀魚臺 在府舊鍾離縣西七里。昔莊子與惠子游於濠梁之上。莊子曰。儵魚出游。從容。是魚樂也。

宋蘇軾詩

欲將同異較錙銖。肝膽猶能楚越如。若信萬殊歸一理。子。今知我我知魚。

夢蝶巷

在舊城夢蝶坊。莊子云。莊周夢為蝴蝶。栩栩然蝴蝶也。俄然覺。則蘧蘧然周也。不知周之夢為蝴蝶。與蝴蝶夢為周。與後人因名。

蘇州府

虎丘山

在府城西北九里。一名海湧山。中有劔池。千人坐石。越絕書。吳王闔閭葬山下。葬三日。白虎踞其上。因名。或云秦始皇嘗登此。將發吳塚。有白虎

出焉。陳顧野王序有云。高不抗雲。深無藏景。岬非培塿。淺異踈林。路若絕而復通。石將斷而更綴。抑巨麗之名山。大吳之勝壤也。白居易詩。怪石千僧坐。靈池一劔沉。海當亭兩面。山在寺中心。

靈巖山

在府城西南二十五里。又名硯石山。乃吳

王館娃宮故地。舊志云。下瞰太湖。望洞庭。兩山滴翠。叢碧。在白銀世界中。亦宇內絕景。山有西施洞。翫花池。採香徑。及琴臺。諸勝。

穹窿山

在府城西南六十里。舊傳赤松子食桂實。石脂於此。山有福臻院。宋米芾嘗大書詩於兩壁。字

名山記
畫奇逸山下有海雲菴菴前有二茶樹其二株皆連
理蓋百餘年矣

玄墓山 在府城西南七十里一名鄧尉山山峯四
立林木葱蘢前一石屹立太湖中若畫屏然山上有
萬峰寺樓閣翬翬湖光掩映亦吳中佳處其山之陰
名至理山山勢蜿蜒前瞰湖水對峙陽山光福諸山
左右夾拱山雖北向隆冬入山其氣盎然

石公山 在府城西南一百二十里山根有石如老
翁立水中洄不露潦不沒故名唐陸龜蒙詩○一片
倒山屏何時隳洞門屹然空濶中萬古波濤痕

洞庭山 在府城西一百三十里太湖中一名包山
漢書云下有洞穴潛行水底無所不通號為地脉道
書以為第九洞天宋蘇舜欽水月院記中有山七十
二惟洞庭稱雄其間民俗魯朴以橘柚為常產每秋
高霜餘丹苞朱實與長松茂樹相差間於巖壑間望
之若圖畫內有角里村毛公壇

馬鞍山 在崑山縣北三里狀如馬鞍孤峰特秀極
目湖海百里無所蔽山出玲瓏石梁沙門慧嚮居此
虞山 在常熟縣治西北為縣之鎮一名海隅山越
絕書坐咸所居又傳虞仲隱於此因名

雪井 在虞山宋元祐中海陵徐神翁第守中將南
游神翁曰逢虞則止無雪則開中至虞山始悟其旨
遂插竹為庵山峭無水一日大雪惟山坳不積中鑿
之果得美泉

憨憨泉 在虎丘山路側水極清冽相傳為僧憨憨
者卓錫所出

白雲泉 在天平山腰乳泉也白居易詩○天平山
上白雲泉雲自無心水自閑何必奔衝山下去更添
波浪向人間

六品泉 在吳江縣南五里唐陸羽品為第四泉張

又新品為東南第六泉清激甘冽烹茶極佳

銷夏灣 在洞庭西山之趾舊傳吳王避暑處

錦帆涇 在府城內即濠也相傳吳王錦帆經游處

高啓詩○水繞荒城柳半枯錦帆去後故宮蕪窮奢
畢竟輸漁父長保秋風一幅蒲

白馬澗 在府城南二十五里晉高僧支遁養馬處

高啓詩○白馬何不居天閑乃在古寺長松間竒姿
不受世羈絡遠自竺國馱經還澗邊飲罷寒雲起恍
惚化龍跳入水空山夜雨不聞嘶埋沒蹄痕紫苔裏

古蹟

神運殿 在馬鞍山昔慧嚮修道於此有神前現願
役鬼工壘石為殿基遺跡甚古

館娃閣 在館娃宮中吳時建高啓詩○館娃宮中
館娃閣盡棟侵雲峰頂開猶恨當年高未極不能望
見越兵來

木蘭堂 在府治唐張搏刺蘇州植木蘭花於堂前
花開宴客命即席賦詩陸龜蒙後至張連酌之強索
題筆云洞庭波浪渺無津日日征帆送遠人頽然醉
倒客莫能續已而龜蒙稍醒續曰幾度木蘭船上望
不知元是此花身

三瑞堂 在楓橋宋孝子姚淳所居其先墓嘗有甘
露靈芝瑞麥之異蘇軾詩 楓橋三瑞皆目見

垂虹亭 在吳江長橋上蘇舜欽詩○長橋跨空古
未有大亭壓浪勢亦豪

姑蘇臺 在姑蘇山上吳闔閭就山起臺二年聚財
五年乃成高見三百里下有百花洲宋楊萬里詩○
插天四塔雲中出隔水諸峰雪後新道是遠瞻三百
里如何不見六千人

問潮館 在崑山縣西南二里夷堅志崑山縣舊有
識潮到怡亭出狀元宋紹興間縣令葉子強建此館

淳熙七年潮果至黃由衛涇相繼應識

松江府

三泖 在府城西南三十六里廣韻泖華亭水也晉陸機對武帝三泖冬溫夏涼圖經泖有上中下之名而舊縣圖又以近山涇圓者曰圓泖近泖橋濶者曰大泖自泖而上縈繞百餘里者曰長泖
啖鶴灘 在養魚池傍晉陸機曰華亭鶴啖可復聞乎許尚詩養鶴人何在湖邊水尚清

古蹟

赤烏碑 在靜安寺乃孫吳赤烏中創寺碑刻宋祥

符遷寺而碑没于江元錢岳詩悲涼斷刻三江底想像雄文六代前

古岡身 在府城東七十里凡三所長百里相傳海中湧三浪而成舊志所謂瀕海之地岡阜相屬謂之岡身此天之所以限滄溟而全吳人也

黃耳塚 在陸機宅村南述異記陸機少時頗好獵有客獻快犬曰黃耳性黠慧能解人語機仕洛常以自隨機久無家問為書以竹筒繫犬頸令馳歸得報復馳還洛後犬死還葬於此

聰道人塔 道人姓仰名德聰宋太平興國間結廬

于余山之東峰有二虎大青小青爲侍天禧間跌坐而逝所葬石塔尚存

常州府

錫山 在無錫縣西七里慧山東峰也周秦間曾產鉛錫昔有樵者於山下得古銘云有錫兵天下爭無錫寧天下清有錫珍天下弊無錫義天下濟自光武以後不復有錫

慧山 在無錫縣西七里舊名九龍山宋蘇軾詩○石路縈迴九龍脊水光翻動五湖天孫登無語空歸去半嶺松聲萬壑傳

張公洞 在宜興縣南二十五里其門三面皆飛崖峭壁惟正北一門可入嵌空邃碧有水散流石乳融結石上有唐人題刻洞中又有燒香臺仙人房玄武石風土記漢張道陵嘗修道於此

善卷洞 在國山東南洞有二曰乾洞曰大小水洞舊經周幽王時洞忽自開二有巨石形常如墮洞中寬廣可坐千人周圍峭壁刻爲佛像有石柱高丈餘號玉柱唐張祐詩金函崇寶藏玉柱闕靈根

陸子泉 在慧山寺源出石穴如洞唐陸羽品天下水味以此爲第二故又名第二泉蘇軾詩○踏破江

南南岸山逢山未免更留連。試携天上小團月來試
人間第二泉。

鎮江府

金山 在府城西北七里江中宋周必大筆錄此山
大江環繞每大風四起勢若浮動名浮玉山唐有裴
頭陀於此開山得金賜名金山山有裴公洞龍王池
妙空巖善財石山後有孤峰鶻棲其上曰鶻山宋高
宗詩○翠然天立鎮中流雄跨東南二百州北虜每
登須破膽無勞平地戰貔貅。

焦山 在府城東北九里江中後漢焦光隱此因名

旁有海門二山金焦相望十五里上有羅漢巖宋理
宗書三大字揭之下有磨崖石刻痊鶴銘李仲殊詩
海門礙目山雙聳江北行人樹幾行

招隱山 在府城西南七里一名獸窟山劉宋隱士
戴顓居此相傳梁昭明太子亦嘗於此讀書石案尚
存下有招隱寺寺內有虎跑鹿跑真珠三泉及玉藥
亭唐李德裕玉藥花詩刻石在焉

中冷泉 在金山寺內唐李德裕嘗使人取此水雜
以他水輒能辨之水經品第天下水味此為第一宋
蘇軾詩中冷南畔石盤陀古來出沒隨濤波

名山言
卷之三
玉乳泉 在丹陽縣治東唐劉伯芻論水以此為天下第四

古蹟

萬歲樓 古府城上西南隅晉刺史王恭建唐皇甫冉詩○高樓獨上思依依極浦遙山合翠微江客不堪頻北望塞鴻何事復南飛○紹興中太守劉岑即其地新之為月觀汪藻記

多景樓 在甘露寺內米芾詩○兩州城郭青烟起千里江山白鷺飛海近雲濤驚夜夢天低月露濕秋衣元趙孟頫詩○層巔官閣幾時修遠艦長江萬里

流白露已零秋草綠斜陽雖好暮雲稠平南籌策張華得治內人材葛亮優景物未窮登覽興角聲孤起甕城秋

望海樓 在府治後宋蔡襄題曰望海後改為漣滄觀米芾詩○雲間鐵甕近青天縹緲飛樓百尺連三峽江聲流壁下六朝山影落尊前幾番畫角催紅日無事滄洲起白煙忽憶賞心何處在春風秋月兩茫然

寶墨亭 在府治西偏以覆陀羅尼經幢宋歐陽脩集古錄云唐雲陽野夫王負之書字畫頗為世俗所

重蘇舜欽詩○山陰不見換鷺經京口今傳瘞鶴銘
瀟灑謫仙來作記風流太守為開亭

妙高臺 在金山上宋僧了元建元趙孟頫詩○江
水西來接太空中流突兀湧鰲宮妙高臺上一回首
看盡世途風浪中

甘露寺 在北固山上吳甘露中建因名內有梁武
帝所書天下第一江山六字所賜鐵鑊二其壘容百
斛唐盧肇詩○北固巖端寺佳名自上台地從京口
斷山到海門來曙色煙中滅潮聲日下回一隅通雉
堞千仞聳樓臺寺內又有北軒杜牧詩○曾上蓬萊

宮裏行此軒闌檻最切田情孤高堪弄桓伊笛縹緲疑
聞子晉笙天接海門秋水色煙籠鹿苑暮鍾聲他年
會着荷衣去不向山僧道姓名

焦山寺 在焦山上內有海雲堂贊善閣吸江亭

鐵甕城 吳孫權所築周圍六百三十步唐乾符中
周寶為潤帥又築羅城二十餘里號鐵甕城言其堅
固也范仲淹詩金山寺近塵埃絕鐵甕城高氣象雄

揚州府

縑絲井 在泰州西溪鎮世傳漢董永寓居於此家
貧父亡貸主人萬錢葬父許身為奴道遇一女求為

妻同造主人約織縑三百匹以償所貸一月而畢遂辭末曰我天之織女也帝以君孝遣我助之言訖凌雲而去井即女所汲以縑絲者

古蹟

瓊花 一名玉蘂花在蕃釐觀內或云唐所植天下獨一株故宋歐陽脩作無雙亭以賞之元至正間朽以八僊花補之鄭惠肅辨其不同者有三瓊花大而瓣厚色淡黃不結子而香葉柔而瑩澤八僊花小而瓣薄色微青結子而不香

露筋廟 在高郵州南三十里舊傳有女子夜過此

天陰蚊盛有耕夫田舍在焉其嫂止宿女曰吾寧處此死不可失節遂以蚊死其筋露焉宋米芾碑記云澤國之女嗜膚露筋不就有幃之子氏不顯於一時名可揭於萬世歐陽脩詩○近聞高郵間有蚊夜凌辱哀哉露筋女萬劫讐不復

鐵棺塚 在興化縣南法華廢寺西長九尺二寸餘前潤後狹宛若棺狀相傳宋建炎間薛慶嘗遣其徒搖動中有物相觸聲以鐵槌擊數百畧無少損又鼓鞞鎔之其固如初乃止

蓮花塚 在興化縣安仁鄉舊傳有姑嫂共刈稻姑

忽墜深溝中。嫂急救之。俱溺死。二屍莖於溝傍。忽生蓮花數塚。里人驚異。啓棺視之。蓮花皆從口出。人稱爲蓮花塚。今雙塚尚存。

淮安府

古蹟

田橫國 在海州東北八十餘里。小鬲山壘石爲城。山孤峰特秀。俯臨深溪。惟東隅可通。人行漢書。漢定天下。齊王田橫懼誅。與其徒屬五百餘人入海居島中。即此。

圯橋 在邳州城東南隅。年久湮沒。元和郡志下邳縣有沂水。號爲長利池。池上有橋。即黃石公授張良。

素書之所。唐梁肅有銘。

東海大松 在大海中。相傳三代時物。其狀奇異。○

紫極宮畫 宮在府城內西南隅。宋熙寧中楊傑作。

記云。嘗有神仙來游。題詩於壁。筆跡漬入。刮之不滅。又有李公麟畫猴戲馬。馬驚而圉。人鞭之時。稱爲奇筆。陳師道詩。○沐猴自戲馬。自驚圉人未解猴馬情。

廬州府

四頂山 在府城東南七十里。俯瞰巢湖。上有四峰。特起亦名四鼎山。相傳魏伯陽煉丹之所。丹成以白犬試之。即仙去。唐羅隱詩。○勝境天然別。精藍在畫。

圖。一山分四頂。三面瞰平湖。

浮槎山 在府城東八十里俗傳此山自海上浮來昔有梵僧過而指曰此耆闍一峰也梁武帝女爲尼於山建道林寺釋用孫詩○山爲浮來海莫沉蕭梁曾此布黃金梵僧親指耆闍路帝女歸傳達磨心地控好峯排萬仞澗餘流水落千尋靈蹤斷處人何在日夕雲霞望轉深山頂有泉極甘美宋嘉祐中郡守李不疑飲之甚甘以遺歐陽脩作記

龍穴山 在府城西一百二十里上有張龍公祠宋歐陽脩集古錄載張龍公碑云張路斯穎上人唐景

龍中爲宣城令生九子嘗語其妻石氏曰吾龍也蓼人鄭祥遠亦龍也吾屢與戰未勝明日取決可令吾子射繫鬣以青綃者鄭也絳綃者吾也遂射青綃者鄭怒投合肥西山以死今龍穴山是也蓋山之東南隅有穴土人以山有一池又呼爲龍池山張又新水記以此池水爲天下第一

龍眠山 在舒城縣西南八十里形若卧龍宋龍眠居士李公麟以此山爲號元燮理溥化嘗繪爲圖。

八公山 在巢縣西北一十八里上有漢淮南王廟王名安好神仙有八公鬚眉皓白請門希見門人曰

吾王好長生先生無駐衰之術未敢聞八公咸變爲
童白日升天遺藥在器雞犬舐之皆飛去宋王安石
詩○淮山但有八公名鴻寶燒金竟不成身與神仙
守都廨何能雞犬得長生

金庭山 在巢縣北九十里舊名紫微山即道書所
謂第十八福地乃王子喬登仙處上有金庭洞下有
紫微玉蘭二洞相連又有杏花泉宋阮美成詩○蕭
蕭葉下曉風寒日上金庭恰一竿行遍杏花泉畔路
紫雲深處見星壇

霍山 在六安州西南九十里一名鱗山一名天柱
漢武帝南巡至盛唐以商嶽衡山遠阻乃移嶽神於
霍而祀焉又名南嶽山山頂有天池龍湫風洞嶽井
試心崖凌霄樹又有淥水池旱不乾澇不溢宋曹灼
詩○七千七百七十丈丈藤蘿勢入天未必展來
空似翅不妨開去也成蓮月將河漢分巖轉僧與龍
蛇共窟眠真是畫工須閣筆况無名畫可流傳

巢湖 在巢縣西一十五里一名焦湖周圍四百餘
里港汊大小三百六十古合肥舒城廬江巢四邑之
境漢永平中湖嘗出黃金郡國志昔有巫言居巢縣
門石龜口出血當陷爲湖未幾有人以猪血戲塗之

巫見之驚走地果陷。青瑣高議古巢一日江水暴漲尋復故道溝有巨魚萬斤三日乃死合郡皆食之獨一姥素好善不食忽有老叟曰此吾子也不幸罹此禍汝不食其肉吾將厚報之東門石龜曰赤城當陷姥日往視有稚子欺之以朱傳龜曰姥見急登山而城陷爲湖。

湯泉 在舒城縣西南七里冬夏常熱可以烹茶又英山縣東西亦有湯泉二四時沸騰不竭

太守泉 在無爲州城內舊景福寺宋米芾詩甘泉如惠山

笑泉 在無爲州西北五十里又名呂泉舊傳呂洞賓憩此卓劍泉忽湧出石底纍纍如貫珠人有笑謾泉益滾沸故俗呼笑泉

古蹟

聚山閣 在無爲州池宋建阮美成記謂閣上見群山聚列惟二山爲最銀瓶之深秀則喬松所居寶峯之壯嶮則吳魏所守也

二石牛 在府城內相傳昔人濬肥河得之土中形製甚精對峙爲角觝狀

安慶府

潛山 在潛山縣西北二十里一名皖伯臺魏左慈嘗居此煉丹上有三峯二巖四洞二池山與皖公天柱三峯鼎峙層巒疊嶂為長淮之扞蔽

天柱山 與潛山連其峰最高道書謂為司玄洞天漢武帝嘗登封茲山祀之以代南嶽魏左慈煉丹故迹存焉唐李明○天柱一峰擎日月洞門千仞鎖雲雷獨孤及詩○早歲慕五嶽嘗為塵機礙孰知天柱峯今與郡齋對漢皇南游日望秩此昭配法駕到谷口禮容振荒外燔柴百神趨執玉萬方會如今封禪壇惟見雲雨晦

三祖山 在潛山縣西北二十里梁高僧誌公隱居處有唐僧僧二祖禪師塔峭壁間刻杜牧金陵懷古詩玉鏡山 在潛山縣北相傳唐時山石忽裂皎然如玉鏡一名玉照山宋黃庭堅詩仙人持玉照留在潛峰西

司空山 在太湖縣西北一百六十里相傳為釋氏二祖傳衣三祖之地山極高峻山半有洗馬池即古司空原唐李白嘗避地于此詩云○卜居司空原北將天柱鄰雪齊萬里月雲開九江春

小孤山 在宿松縣南一百二十里江北岸孤峯峭

名山記 卷之三 三十三
拔與南岸山對峙如門大江之水至此隘東而出其
下深險可畏上有神女廟對彭浪磯故俗有小姑嫁
彭郎之語元范梈詩○小孤有石如虎蹲西望屹作
長江門洪濤萬古就繩墨雖有勁勢不敢奔揭傒斯
詩○日落霞明錦浪翻崖傾石峭白雲閑乾坤上下
雄孤柱吳蜀東南壯此關。

石牛洞 在潛山縣西北二十五里宋黃庭堅讀書
于此愛其山谷之勝因號山谷道人中有李公麟畫
庭堅坐石牛像庭堅詩○鬱鬱窈窕天宮宅諸峰排
霄帝不隔六謁天門開關鑰我身金華牧羊客羊眠

野草我世間高真衆靈思我還石盆之中有甘露青
牛駕我山谷路。

西風洞 在太湖縣北二十五里兩石壁立穴口潤
五尺入內漸狹風從上出草木不生每六七月間環
縣數里無蚊。

龍山崖 在太湖縣西三里石壁峭立下有靈湫石
上刻詩○波光照影肝膽寒嵐氣逼人毛髮立。

盡忠池 在府城西通大江舊名清水塘元末盜起
余闕以淮西宣慰分治安慶城陷赴此死後人爲改
今名本朝童輩詩○荒城落日暝雲陰獨立空山淚

滿襟遺老能言當日事，寒泉猶照死時心。

卧冰池 在望江縣西二里。晉王祥嘗自臨沂扶母避地於此，人慕其孝，因以名池。以祥嘗卧冰求魚食，毋故也。

古蹟

海門第一關 在小孤山元天曆中立鐵柱於此。長三丈有奇。

小石橋 在三祖山中。宋黃庭堅詩：「司命無心播物祖，師有記傳衣白雲，橫而不渡高鳥倦而猶飛。」

喬公故居 在潛山縣北五里。漢末喬公居此。公二

女皆國色。孫策克皖，自納大喬。周瑜納小喬，後人於其故址建亭，名秀英。本朝徐賁詩：「孫郎謀畧周郎智，相逢便結君臣義。丰姿聯璧照江東，都與喬公作佳婿。」

皖口 在府城西一十里。一名山口鎮。唐李涉嘗過此，遇盜盜問知為涉，聞其有詩名，索詩。涉賦一絕云：「春雨瀟瀟江上村，綠林豪客夜知聞。他時不用相迴避，世上如今半是君。」

太平府

牛渚山 在府城北二十五里。下有磯曰牛渚，去采

石磯僅一里舊為險要備禦之地亦名然犀浦世傳下多怪物晉溫嶠燃犀照之須臾見水族覆火奇形異狀或乘馬車着赤衣憤其夜夢人謂曰與君幽明道別何意相照即此

天門山 在府城西南三十里二山夾大江東曰博望西曰梁山對峙如門亦名義眉山又名東梁山西梁山李白詩○天門中斷楚江開碧水東流至此迴兩岸青山相對出孤帆一片日邊來。

嶋磯 在蕪湖縣西七里大江中嶋老蛟也今磯南有一石穴廣一丈深叵測蓋嶋所居宋黃庭堅書嶋

磯云嶋似蛇四足能害人漢賈生所謂蝮蟻瀨以隱處者也

三山磯 在繁昌縣東北四十里宋陳堯佐嘗泊舟磯下有老叟曰來日午有大風宜避之堯佐信其言至期果大風暴至行舟皆溺堯佐獨免又見前叟曰某江之游奕將也以公他日當位宰相故相告耳

古蹟

夢日亭 在故王敦城上宋僧蘊湘建按晉明帝聞王敦將舉兵微行至湖陰察之敦晝夢日環其城驚起使五騎追帝帝馳去見逆旅賣食媪以七寶鞭與

之曰。後有騎來。以此示之。嫗如其言。五騎傳翫。稽留帝。僅獲免。亭因以夢日名。又有翫鞭亭。在蕪湖縣北二十里。楊萬里詩。○老賊平欺。晉鼎輕。一輪日色。夢中驚。寶鞭脫急。非無策。何似休將日繞營。

凌歊臺 在府城北黃山之巔。劉宋孝武帝南游。登此臺。建離宮。李白詩。○曠望登古臺。臺高極人目。巖嶂列遠空。雜花間平陸。欲覽碑上文。苔侵豈堪讀。許渾詩。○宋祖凌歊樂未回。三千歌舞宿層臺。

縹緲臺 在繁昌縣治後山絕頂。下瞰大江。對濡湏津。茂林脩竹。隱映左右。

寧國府

文春山 在寧國縣西二十里有山門。漣漪紫雲朝陽。夕陽碧雲六洞。宋梅堯臣張獻民同游留題石刻尚存。

黃山 在太平縣南二十里。昔黃帝與浮丘仙人鍊丹于此。山當宣徽二郡界。有二十二峰。二十六源。二十四溪。十八洞。八大嶺。唐李白詩。○黃山四千仞。三十二蓮峯。丹崖夾石柱。菡萏金芙蓉。伊昔陞絕頂。俯窺天目松。仙人鍊玉處。羽化留餘蹤。

石壁山 在旌德縣北二十里。峰巒對起。清溪中流。

最為奇絕

石柱山 在旌德縣西六十里相傳梁程靈洗抽矢射山有雙石挺然獨立而一巨石承之乃靈洗立幟之所

射的山 在南陵縣西三十里山有玉在石壁內昔有取之者遇風雨而止人望之頗似射侯因名

古蹟

敬亭 在敬亭山李白詩○敬亭一回首目盡大南端僊者五六人嘗聞此游盤

鐵牛門 在府治東北雙牛鐵鑄五代林仁肇更築

羅城舊門關皆改革惟存鐵牛

磨崖碑 在涇縣西石隴洪頭山唐天寶中所刻者

池州府

齊山 在府城南三里山有十餘峰其高齊等故名又有妙空武功寄隱竇雲玉桂有待等巖九頂圓頂華蓋蓮子左史石虎等洞極為奇勝或云山因唐刺史齊映得名唐杜牧九日詩○江涵秋影鴈初飛之句宋吳中復詩○當時齊映為州日從此山因姓得名却自牧之賦詩後每逢秋至菊含情

九華山 在青陽縣南舊名九子山唐李白陋其名

無所據以山九峰如蓮花乃更名九華杜牧詩○凌
空瘦骨寒如削照水清光翠且重却憶謫仙才格俊
鮮吟秀出九芙蓉

中峰 在青陽縣西衆峰環列而此峰居中上勝日
月下觀雲雨清泉迸石翠霧凝空

半巖 在齊山李元方云齊山大小泉凡十一而半
巖爲勝

金鷄石 在建德縣草堂寺北相傳唐羅隱過此題
詩有金鷄不向五更啼之句石遂迸裂有鷄飛鳴而
去

古蹟

翠微亭 在府城南齊山之巔唐建俯瞰清溪高爽
可愛岳飛詩經年塵土滿征衣特特尋芳上翠微好
水好山看未足馬啼催趁月明歸

徽州府

黃山 在府城西北一百二十里舊名黟山唐天寶
末改今名山有峰三十二水源三十六溪二十四洞
十八岩八第四峰有泉沸如湯常湧丹砂浴之能愈
風疾世傳黃帝嘗與容成子浮丘公合丹於此又有
仙人曹阮之流亦嘗於此修真故山有浮丘容成諸

峰。溪有曹阮之名。

白嶽山 在休寧縣西四十里中。峰獨聳。傍有懸崖。小徑可憑而上。絕頂有池。池西有石室。學仙者多居之。其東北又有五彩石壁。狀若樓臺。有飛動之勢。

石照山 在績溪縣東五里有石高二丈。光可鑑物。故名。宋蘇轍詩。○雨開日照正。新磨鳥度猿。攀野老。過忽見塵容。應笑我年來底事白鬚多。

靈谷洞 在婺源縣西北一百二十里。中有洞。靈觀觀東北曰慶雲洞。岩竇皆五色。兩崖上有鸞鶴雲霞之象。芝田靈草羅列左右。西曰蓮花洞。洞有大石室。內平有積雪臺及沉香岑。

古蹟

石村 在休寧縣西三里。舊名吳口村。西南有石壁。下臨深溪。舊經云。昔有兩舟泊此。一祭一否。夜有神人徙祭者舟北岸。有石自絕壁墜碎。不祭者舟石墜處遂成石室。

廣德州

石婦山 在州城東南五十里。衆山環繞中。一峯獨高。峯之顛有石高二丈許。如婦人狀。舊傳謝氏女介。

縈有守。登山化為石。藤蘿薜荔。縈繞其上。如衣被之。狀獨露其面。樵者不敢採。

靈山 在州城南七十里。泉石甲於一郡。上有文殊巖。普賢臺。羅漢洞。山水合流而出。匯為丁公潭。逶迤數里。前後有兩巨石。平廣數十丈。流瀑垂其上。望之如織機。

大洞 在州城東北七十里。廣數丈。深不可測。游者秉燭而入。有石燕群飛。乳泉滴瀝。神人佛像。碁盤鐘磬之屬。皆白石天成。其東洞水深不可入。

和州

鷄籠山 在州城西北四十里。以形似名。道書為第四十二福地。唐李思聰詩。○山狀鷄籠。攢翠黛。水通滴瀝。落冰崖。誰知內隱神仙宅。金疊雲房玉作階。○褒禪山 在縣北一十五里。舊名華山。山有起雲峰。龍洞。羅漢洞。龍女泉。白龜泉。

華陽山 在含山縣北一十八里。上有二洞。前洞游者甚衆。後洞獨王安石游焉。有記。

濡湏山 在含山縣西南七十五里。與無為州七寶山對峙。中有石梁。鑿石通流。山水險阻。最為控扼之。雄吳據其北。築塢以拒魏。號濡湏塢。魏據其南。為關。

以備吳蜀號東關宋張孝祥詩二關形勝千年壯即此

烏江浦 在州城北故烏江縣東四里項羽敗於垓下東走至烏江亭長艤船待羽即此地唐胡曾○烏江不是無船渡耻向東吳再起兵又僧詩○拔山力盡烏江水今古悠悠空浪花

平疇湯泉 在州北三十五里其色深碧沸白香氣襲人有患瘡疥者浴之輒愈宋耿憲秦觀俱有記半湯泉 在縣末興院宋呂愿中○人情尚水炭地脉亦炎涼

滁州

琅琊山 在州城南一十里晉琅琊王嘗駐此因名其山谷深七八里自城南行六七里至溪溪之源出兩峰間為釀泉顧况詩○東晉王家在此溪南山樹色隔窓低碑沉字滅昔人遠谷鳥猶向寒花啼

庶子泉 在琅琊山以唐庶子李幼卿得名梅堯臣詩庶子去來多少年依舊清心共泉潔

六一泉 在醉翁亭側歐陽脩晚號六一居士故名

古蹟

醒心亭 在豐樂亭東山上歐陽脩建常安民詩○

爲愛昌黎湖上句醉來直上醒心亭煩醒不待山風
解卧讀殘碑已自醒

記文

游金陵記

宋 陸游

七日早游天慶觀在冶城山之麓地理家以爲此山
脉絡自蔣山來不可知也吳晉間城壘多因山爲之
觀西有忠烈廟祀卞壺也以嵇紹及壺二子眡眊配
食紹死惠帝時在壺前且非江左事而以配壺非也
廟後叢木甚茂傳以爲卞壺墓墓東北有忠孝亭亭
本南唐忠貞亭後避諱改焉忠貞壺謚今日忠孝則

以其二子死父難并名之也登覽久之遂出西門游
清涼廣慧寺寺距城里餘據石頭城下臨大江南直
牛頭山氣象甚雄然壞於兵火舊有德慶堂在法堂
前堂榜乃南唐後主撮襟書石刻尚存而堂西徙矣
又有南唐元宗祭悟空禪師文登石頭西望宣化渡
及歷陽諸山真形勝之地若異時定都建康則石頭
當仍爲關要或謂今都城徙而南石頭雖守無益蓋
未之思也惟城既南徙秦淮乃橫貫城中六朝立柵
斷航之類緩急不可復施然大江天險都城臨之金
湯之勢比六朝爲勝豈必依淮爲固耶八日晨至鍾

山道林真覺大師塔。塔在太平興國寺上。寶公所葬也。塔中銅鑄寶公像。有王文公銘在其膺。僧言古像取入東都。啓聖院塔西南小軒曰木末。其下皆大松。髯甲天矯如蛟龍。徃徃數百年物。木末取王文公詩。有木末比山雲冉冉之句。故取名之。塔後又有定林菴。舊聞先君言李伯時畫文公像於菴之昭文齋壁。着帽束帶。神彩如生。文公沒齋常扃閉。遇重客至。寺僧開戶。客忽見像。皆驚。覺生氣逼人。寫照之妙如此。今菴經火矣。歸途過半山。少留。半山者王文公舊宅。所謂報寧禪院也。自城中上鍾山。此爲中途。故曰

半山寺。西有土山。今謂之培塿。亦取文公詩。所謂溝西顧丁壯。擔土爲培塿。名之也。寺後又有謝安墩。文公詩云。在冶城西北。即此是也。九日至保寧戒壇二寺。保寧有鳳凰臺。攬輝亭。臺有李太白詩云。三山半落青天外。二水中分白鷺洲。今已廢。惟亭因舊址。重建亦頗宏壯。寺僧言亭榜本朱希真隸書。法堂後有片石。瑩潤如黑玉。乃宋子嵩詩題云。鳳臺山亭子。陳獻司空鄉貢進士。宋齊丘司空者。徐知誥也。後改姓名曰李昇。是爲南唐烈祖。而齊丘爲大臣。後又有題字云。昇元三年奉勅刻石。蓋烈祖既有國。追念君臣

相遇之始而表顯之昇齊丘雖皆不足道然當攘奪
分裂橫潰之時其君臣相遇不如是亦不能粗成其
功業也戒壇額曰崇勝戒壇寺古謂之瓦棺寺有閣
因岡阜其高十丈李太白所謂鍾山對北戶淮水入
南榮者又橫岡詞一風三日吹倒山白浪高於瓦棺
閣是也

評 中一段建都議論甚為有識

游鍾山記

明 宋濂

鍾山一名金陵山漢末秣陵尉蔣子文逐賊死山下
大帝封蔣侯大帝祖諱鍾又更名蔣山實作揚都之
鎮諸葛亮所謂鍾山龍蟠是也歲辛丑二月癸卯予

始與劉伯溫夏允中遊日在辰出東門過半山報寧
寺寺舒王故宅謝公墩隱起其後西對培塿小丘培
塿蓋舒王病濕鑿渠通城河處南則陸靜脩茱萸園
齊文惠太子博望苑白煙涼草離離蕤蕤使人躊躇
不忍去沿道多蒼松或如翠蓋斜偃或蟠身矯首如
玉虺搏人或捷如山猿伸臂掬澗泉飲相傳其地少
林木晉宋詔刺史郡守罷官者栽之遺種至今抵園
悟關關宋勤法師築太平興國寺在焉梁以前山有
佛廬七十今皆廢唯寺為盛近燬于兵外三門僅存
適松花正開黃粉麩觸人詩興予獨出行函道間

會章君三益至遂執手上翠微亭登玩珠峰峰獨龍
阜也梁開善道場寶誌大士塋其下未定公主造浮
圖五成覆之後人作殿四阿鑄銅貌大士實浮圖浮
圖或現五色寶光舊藏大士履神龍初鄭克俊取入
長安殿東木末軒舒王所名俯瞰山足如井底出度
第一山亭亭顏米芾書亭左有名僧婁慧約塔塔上
右其制若圓楹中斲爲方下刻二鬼擎之方上書曰
梁古草堂法師之墓有蝠匾法定爲梁人書復折而
西入碑亭碑凡數輩中有張僧繇畫大士相李白贊
顏直卿書世號三絕又東折度小澗澗前下定林院

基舒王嘗讀書於此院廢更翔雪竹亭與李公麟寫
舒王像洗硯池亦皆廢又北折至八功德水天監中
胡僧曇隱來棲山龍爲致此泉今甃作方池池上有
圓通閣閣後即屏風嶺碧石青林幽邃如畫前乃明
慶寺故址陳姚察受菩薩戒之所又東行至道卿巖
道卿葉清臣字也嘗來遊故名有僧宴坐巖下問之
張曰視弗應時雉方桴粥聞人聲戛戛起巖草中從
北至靜壇多臧衿先生遺跡復西折過桃花塢詢道
光泉舒王所植松已遊唯泉紺淨沉沉如故日將夕
章君上馬去予還廣慈明日甲辰予同二君游崇禧

院文皇潛邸時建。從西廡下入。末春園園雖小。衆卉畧具。揉栢爲麋鹿形。栢毛方怒長。翠濯濯可玩。二君行倦。解衣覆鹿上。掛冠鼠梓間。據石坐。主僧全師具壺觴。予不能酒。謝二君出遊。夏君愕曰。山有虎。近有僧采薜虎。逐入舍。僧門焉。虎爪其顴。顴有癢。可驗。子勿畏。往矣。予意。夏君給我挾兩騶奴。登惟秀亭亭。宜望遠。惟秀末春。皆文皇題榜。塗以金。又折而東。路益險。予更甚。僑倚騶奴。有跼蹐行。息促甚。張吻作鋸木聲。倦極。思休不問。險濕蹠蹠。據頓地。視燥平處。不數尺。兩足不隨。久之。又起行。有二臺。闊數十丈。上可坐。

百人。即宋北郊壇祀。四十四處。問蔣陵及步夫人冢。無知者。或云在孫陵岡。至此屢欲返度。其出已遠。又力行。登慢坡。草叢布如氈。不生雜樹。可憇思。欲借裊褥。卧不去坡。古定林院。基望山椒。無五十弓。不翅千里。遠竭力。躍數十步。輒止。氣定。又復躍。如是者六七徑。至焉。大江如玉帶。橫圍三山。磯白鷺洲。皆可辨。天闕芙蓉。諸峰出沒。雲際鷄籠。上下接落。星澗澗水。漉漉流。玄武湖。已堙。又三神山。皆隨風雨。幻去。西望。又之。擊石爲浩歌。歌已。繼以感慨。又久之。傍崖尋一人。泉。泉出小窾中。可飲。一人繼以千百。弗竭。循泉西過。

黑龍潭潭大如盎有龍當可屠側有龍鬼廟頗陋由潭上行叢竹翳路左右手開竹身中行隨過隨合而腥風逆鼻群鳥哇哇亂啼憶夏君有虎語心動急趨過似有逐後者又棘針鈎衣足數躓咽唇焦甚幸至七佛庵庵蕭統講經之地有泉白乳色即踞泉巉巖衫袂落水中不暇救三嚙神明漸復庵後有太子巖一號昭明書臺方將入巖游庵中僧出肅向有新瘡詢之即向采菴者心益動遂舍巖問別徑以歸所謂白蓮池定心石宋熙泉應潮井彈琴石落人池朱湖洞天皆不復搜覽還抵永春園見肴核滿地一鬣

立花下問二客何在童云遲公不來出壺中酒飲且賦詩大噱酒盡徑去矣予遂回廣慈二君出迎夏君曰子顏色有異得無有虎恐乎予笑而不答劉君曰是矣子幸不葬虎腹當呼斗酒滌去子驚可也遂同飲飲半酣劉君澄坐至二更或撼之作舞笑鈎之出異響畏脇之皆不動予與夏君方困睫交不可擘乃就寢又明日乙巳上人出猶未歸欲游草堂寺雨絲絲下意不住乃還按地里志江南名山唯衡廬茅蔣蔣山固無聳拔萬丈之勢其與三山竝稱者蓋為望秩之所宗也晉謝尚宋雷次宗劉劭齊周顒朱應吳

包孔嗣之梁阮孝緒劉孝標唐韋渠牟並隱於此今求其遺跡烏沒雲散多不知其處唯見羗兒牧豎跳嘯於淒風殘照間徒足增人悲思况乎人事往來一日萬變遠人大觀又何足深較予幸與二君得放懷山水窟一刻之樂千金不易也山靈或有知當使予游盡江南諸名山雖老死煙霞中有所不恨他尚何望哉

游牛首山記

明 都穆

金陵多佳山牛首為最山據城之南初名牛頭以雙峰竝峙若牛角然佛書所謂江表牛頭是也晉王丞

相導嘗指曰此天闕也後又名天闕山云丁卯七月廿有二日吏部主事顧華玉與予約客戶部員外郎黃子和朱升之國學士陳魯南而予兒元翁侍焉遂北出鳳臺門南行十五里至塘灣又南行十里度嶺又三里抵山舍西上二里達弘覺寺門內二井其左曰白龜池右曰虎跑泉後僧以其險更甃為井而虎泉尤清冽寺衆汲於此躋石級庭中銀杏一株圍可二丈午食畢登浮圖至其顛有聯句詩經修廊東行緣石魚貫上登觀音閣憑闌俯視第見浮圖之尖再上間有捨身臺及辟支佛足跡以峻險不及觀下至

堯率巖空洞上突出如屋。又之至文殊洞前有屋一楹。衆復聯詩書壁上。既而登山之背觀蕭昭明飲馬池。徑可丈餘。冬夏不涸。下而西至辟支洞。廣差勝文殊石浮圖立其前。辟支舍利所藏處也。老僧言少嘗見舍利放光。今數十年矣。浮圖有石刻二。其一宋皇祐二年記。不著撰人。中載誌公答宋明帝語云。昔辟支佛冬居於此。其一乃如愚居士詞。字絕類黃太史。居士殆隱逸之儔與。西下經禪堂旁室。闔其門有竅。如錢日光射浮圖影。倒挂佛案紙上。不可曉也。夜燕方丈。予以倦睡去。衆作詩角險。至鷄號乃罷。二十四

日早出寺而南山路斗峻。馬屢前却。時雲霧四興。遙視山足。則日光在田禾黍映之。綠黃縈碧。如僧伽黎。予笑語三君。不知身之在。人間世也。五里至獻花巖。石益竒麗。中虛深可十步。儼若堂宇。相傳唐高僧嬾融嘗居其中。有百鳥獻花之異。巖因以名山。故有幽棲寺。今廢。成化間山東僧道興至。堅坐不動。有財者樂爲之施。寺由是復興。今名華巖。巖之南曰屯雲亭。又南曰芙蓉閣。閣嵌巖石。登其上。群峯攢蹙。悉在目。眺山之最佳處也。衆共飲焉。北下僧廬。其扁曰無邊風月。可坐眺遠。又下有軒曰無塵。仍飲賦詩。又二里

名山記
卷之三
出山是爲記

遊靈谷記

明 呂柟

三月之暮五山潘子約諸僚同遊靈谷予以足疾不能遠馬賃輿先往蓋靈谷周幾十餘里東界木公山而松巨四五里縱橫絡繹雜列間植微僦甌甃路則不得其門而入矣往年同南橋李子日午始往不爰即返未盡其竒於心恒不忘故五山約不俟聯鑣而獨先也至第一禪林門下輿徒步里餘就蔭佇立四面睇望虬枝蛟枚如麻如葛然體幹瘦細間有三二合抱者則又爲群木壓挽匝擠不能直挺予嘆玩焉

其下瑤草仙丹碧紫爛熳或並藤蘿纏穆縈蓋問諸吏皂但曰野花則又嘆曰彼抱美含芳于幽獨而不名者其殆此乎比至方丈門見洪武十八年至二十九年高祖七勅備言栽種松竹果子之由禁止蒞牧再進至青林堂見簷前懸榜高祖親制山居詩十二篇賜覺義清澹者益悉靈谷幽勝乃知此寺所造甚遠非偶然也未幾五山及雙山秦子在軒胡子雍里顧子郭山况子皆至乃遂出遊大佛殿又後登禪堂崇峻弘敞爽人心目而寶公石像正當其下爲吳道子所畫果非塵世形態旁鐫自著十二時歌又

北觀寶公塑像在浮屠塔下旁有長榜壁立不可上
乃已遂出東觀八功德水之九曲曲上一松奇古或
云高祖掛衣處遂至無梁殿殿皆瓴甌作三券洞不
以木爲梁只此一殿費可萬金其規制又多自齊梁
時來。國朝雖或補葺然必不加也。上西廊觀吳道
子所畫折蘆渡江及烏巢佛印三教畫壁乃還登青
林堂五山乃又行酌酌未半有滿親住持者來叅持
學士顧公詩以觀蓋顧公九和依僧語作二偈爾觀
畢滿茶許之時日已大西遂行而浩乃送至琵琶街
自鼓掌請聽琵琶聲口兼呼諸從者亦鼓掌浩亦大

笑然實未有聞也因問此殿前何以有此聲浩曰空
谷作聲爾曰此殿以上凡四五層其上者何以無此
聲浩不對在軒雙山皆曰山谷之聲太近亦無大遠
亦無虛實之間遠近之中乃又夾以長廊俯以崇臺
此感彼應氣使然爾遂西至竹澗有閉關僧鑿板竇
以通飲食竇上懸棲雲處三字予曰此室中亦有雲
邪五山屢以偈語詰浩浩不能對以他語應遂出時
滿親以邀茶至見壁上懸二尊官詩浩與滿親猶指
矜云云曰僧但不到家到家便見其家中所有無爾
遂還予先至朝陽門候諸君而後別五山名穎字叔

愚寧海人雙山名儀字相之臨桂人南橋名清字介卿龍陽人在軒名廷祿字原學雲南人雍里名慶圭字武祥崑山人郭山名維垣字翰臣高安人予則名柝字仲木號涇野高陵人

游獻花巖記

明 喬宇

從牛首南緣山徑紆曲經數峯約五里至西風嶺東行有石窟如屋題曰獻花巖云唐法禪定於此有百鳥獻花之異因名巖內復有竅東出一旁曰歸雲亭崖之下有一徑至大觀堂堂制極橫敞前繚以短垣凭之則牛首山如障京城宮闕歷歷可見入華巖寺

登芙蓉閣在石間懸出閣之右有亭六角曰六觀亭亭之右有修廊臨虛曰翠微房之後登山徑至拱北峯峯之上復有亭曰聳翠亭之上又數百級乃至頂頂極平曠東下有補衲臺亦法禪定補衣處也

游清涼山記

明 喬宇

石城門內之北二里有山環遶經石梁入徑至清涼寺其寺乃南唐李主避暑處故曰清涼至今多竹相傳其所遺者其山面城平曠中有竒基乃翠微亭之故址也登眺則都城宮闕軍廩官府居民街巷遠而長江列嶽皆歷歷在目城中具山水之幽盡登覽之

勝者無如此山徑南折有靈應觀臨烏龍潭面城負山亦幽隱而登眺則不及也

游冶城山記

明 喬宇

冶城乃吳冶鑄之地晉元帝移于石頭城東高阜唐韓滉築五城此其一也謂之冶城宋置天慶觀其上即今朝天宮也宮之制外門弘敞內立建置碑又入大門從修廊九曲而入臺殿崇峻侈麗諸司習儀之所殿宇後有亭黃其垣據高阜之巔云 高皇嘗于此更衣西下有西山道院門徑幽隱高臺短垣可以遠眺又從迂徑而出據山之西一亭林木扶疏岡壟起伏不見城市亦佳處也又西下乃晉卞忠貞墓前有祠亦掌于宮之道士

游盧龍山記

明 喬宇

山在儀鳳門內與獅子山相連蜿蜒而東故名盧龍山山阿有道觀因山之名山憑城瞰大江抱都邑崔嵬兀起實據龍江之險由臺宇旁一徑叢樹環遶而上至其巔則平春廻拱去江咫尺林木中江影掩映可愛 高皇嘗登其上建閱江樓命學士宋濂記之後復 親製記一篇今樓已毀故趾尚存山之西下都城之外有天妃宮靜海寺亦山之麓故各據形勢

奇偉可觀。靜海毘盧閣前有石磊砢岩穴相貫石間。有宋人泊舟于下題名。二音觀此則江實流于其下也。

游攝山記

明 喬宇

出都城北經蔣山廟東行出姚坊門三十里入山後有田疇平野度石橋而東復入山古檜長松連抱夾路至棲霞寺。寺扁乃宋人書志云。仁宗賜金寶牌額。熙寧間取寄華藏寺恐此額非也。外叢篁中一碑乃貞觀所刻字法右軍尚完。寺殿宇皆古制。殿後有石浮圖數丈極精巧。所鑄釋像于上寸許者眉髮皆具。前有二石佛丈餘露立。有吳道子筆法。左入山嶺嶺

之旁有泉縈迴其聲漱石冷冷可聽。山千巖盤繞隨處皆鑿釋像于中。飾以金碧頂上俱有火焰歲久剝落深隱者其飾猶存。身皆有孔云。當時有纓絡置其上。大者數丈小者盈尺望之如蜂房。燕壘皆有徑可到。名千佛嶺。志云齊明僧紹故宅捨為寺。釋佛皆齊文惠太子所鑿。盡工師之妙。今佛頭皆斷而復續。岩中有沈傳師徐鉉張稚圭王雱題名。由嶺而北登攝山。山多藥草可以攝生。故名。山之頂極衆山之高。下視江水如帶。左龍江右龍潭。前瓜步真州金焦二山如塊石在江中。江南登臨奇壯之勝叢林之古無踰

于此乃題名而歸

游幙府山記

明 喬宇

予每遊梅花水水在崇化寺後石竇隱隱而出注於池其寺之山蜿蜒起伏背向相望地頗幽邃蓋出都城北十餘里後聞幙府山即去寺二里許實相連屬癸酉仲秋出遊從李子岡西行與梅花水之路實歧于此乃緣山二里許山之闕見寺之殿脊由徑廻曲渡石橋入寺寺荒落頗幽後一室有石榻云吳王所棲又有蘆數枝云古僧達磨渡江折于此此其所遺也皆漫不可考出寺一徑登山至一絕壑但見江水

洶洶於前崎嶇不可行復折南至山脊平曠處趺坐云此地即晉王導迎瑯琊王東渡建幕之處也山名取此又登至巔見江流浩渺兼葭楊柳田疇沙渚相帶遠近征帆漁艇輕鷗飛鴈歷亂于前時草黃落路滑兩人掖之而下緣山曲久足向北行至一巖空洞窿起下臨江流云達磨嘗息于此予篆題達磨洞三字并識歲月與同遊者姓名兩峰相夾處有小城堞蓋都之外郭阻山帶江者也其峰名夾驪亦釋氏家之說相傳至今

游燕子磯記

明 呂柟

名山記 卷之三 四十二 三百八十三
出寺西則觀音巖也怪石礚垂蒼黛參差上接雲霄而
大江自龍江關西南來直過其下俯按墻睇之可駭
僧曰此其下基皆石甃予嘆曰苟有基雖臨深淵亦
無妨也乃從僧上觀音閣閣亦傍岩下就江唇築基
上交豎九柱皆丹柱上棚棧構閣閣三面皆闌干馮
之瞰江若在樓船頂立也是時晴見萬里日映碧流
江豚吹浪上下西望定山如峨眉東指爪步如丘垤
他山皆閃閃冥冥如落鴈蹲鴻不可辨矣昔予在解
州嘗遊龍門眺底柱登流丹亭汲河烹茶以吊禹墳
至此乃勃然興懷將天下奇觀尚有過斯二者乎夫

河北方之經也江南國之紀也而龍門底柱以及茲
巖不可不謂之能觀瀾矣已而曰彼禹之親窮其源
流者又不知何如也閣東厓有白巖喬公篆書刻石
上而虛齋弘齋皆至乃復同升閣上流覽嘆賞虛齋
欲列席懸巖上對江而酌予頗難之弘齋曰此何妨
昔予至天台鴈蕩天柱一峯突兀率律四面如削其
高不啻數百丈亦嘗茶酒其下予聞之又飄然志在
天柱峯頭矣是時酒肴既行卒爵欲往燕子磯虛齋
乃招二篙師泛舟往至觀音港登壽亭侯廟先至水
雲亭其扁爲予友景前溪書精采如神乃面江小坐

遂上謁壽亭侯祠左有大觀亭亦前溪書至此看江
日隱斷雲烟霧霏微蒼茫無際矣遂攀松捫蘿以上
燕子磯磯皆巉石疊起水圍三面其石罅猶見江轉
磯底可以高覽八極也乃坐中磯道士曰五七年前
江衝磯前深不可測自立關廟後水頗遠磯而去今
南徙磯東數百家矣二君皆補和前詩虛齋又命行
酌興酣北望泰山東瞰蒼海瀨氣縈迴靈光掩映不
知此身之在天地間也抵暮而下晨興大常西唐牛
公毅菴黃公祭天妃廟放舟來聞予二人皆在乃即
枉顧於倚磯亭遂酌二公而後赴大觀亭之宴予問

自西來新亭何處爲的西唐曰據盧循傳其敗在江
西南而後東入于海似今馴象門外爲是予曰志稱
勞亭亦近是此或然也於是西唐或舉海上諸寇自
尉佗以至孫恩或舉大行諸賢如岳飛劉因京房東
哲許魯齋之輩不以爲誇毅菴或言曲江何真開嶺
保障之功或舉昌黎元城東坡避地之美不以爲謙
於戲自 聖祖開國以來混車書於六合兼江河于
一統故予得與諸公登斯亭也

游陽山記

明 胡廣

末樂三年秋 皇帝因建碑 孝陵斲石于都城東

北之陽山得良材焉其長十四丈有奇濶不及長者
三之一厚丈二尺色黝澤如漆無疵壘越九月戊午
特命翰林臣往觀於是學士解公縉紳侍講金公幼
孜暨廣偕往巳未由朝陽門出過十里舖直抵滄波
門門外隔平疇山蟬聯起伏即城中所見諸山也山
下烟林村落耕夫餉婦橫縱隴畝予三人觀其作勞
徘徊久之見田塍畔繫二舟田水與大江相通故有
舟然平疇曠野見此一舟亦自竒絕水之上有古石
橋石半墮橋下橋西北有土溝問之溝傍人云國初
取土築拒馬牆就以疏牆內流水由拒馬牆折北而

行至麒麟門折東行五六里漸多坡陀幼孜與予乘
肩輿上下山岡輒相與步行以息僕夫之力解公騎
行常先一二里許不見予二人來輒下馬候又東過
一長阪阪下路岐而二一依坂足折北一下田間折
而南予方惑所從田間人曰南行遂遵田畔折入小
村市東山麓度坳入谷行長稜十餘里始至陽山山
下草茭數百間以舍趨事者周以樊通二門入門有
井有石池出門上百步許有井井之外有深坑平山
上上石填之舉石者邪許之聲相應仰見石窾然
城立三人相視驚嘆所未嘗見謂天生此石以有待

名山記 卷之三 四
也山高數里其體皆石其旁巉巖不便登陟從碑石
左攀躋而上一人引手一人下推又躋一級漸至山
頂石如磬頭者窅窅者竅而通者高者下者險不可
履蟻緣而度漸過碑石右稍平可行余心悸目眩不
能下視獨解公登石立久之余坐息定更踰山頂數
十步望見長江數百里隱隱而來舟帆上下如豆江
北諸山澹然於烟霏霧靄間杳不能辨山近東北二
峰峭拔如削即都城東門望見二峰青翠高聳者山
南有葉丞相墓按葉袒洽熙寧三年廷對第一官至
徽猷閣直學士終于真州奉勅葬此金陵志亦以爲

墓在宣義鄉即此而俗誤傳葉丞相也南望鍾山一
峯秀立天際如玉筍都城萬雉紅光紫氣蔚蔚葱葱
結爲龍文散爲霞彩誠萬世帝王之都也日午下山
回至小村市望見樹林陰翳中一徑沿澗上兩傍皆
松柏有古寺甚牢落梁本業寺也翔於天監九年五
代時碑刻尚存有古桂二株其本枯朽其旁枝復拱
抱又將枯矣疑與寺同植者從旁入一小軒軒外多
竹其南有古井汲以烹茶味甘冽復尋寺前小徑轉
登寺後山山多石石罅多棘刺行則鉤衣以手褰衣
去地尺徐行至一巨石上坐眺少頃從山脊下至寺

名山記
地志云。謝靈運墓在寺近。叩僧不知其處。庚申日離寺。由故道入麒麟門。緣鍾山麓而行。午至靈谷寺觀。當時善畫者。圖雪景海水于壁。寺僧出東坡詩。翰有元諸名公品題。并宋遂篆書金剛經。觀之至暮而還。

游白鶴道院記

明 呂柟

四月十一日雙山秦子游梅花水。十七日大雨去梅。花水實難。於是開宴於協律郎朱氏之白鶴堂。比予至而五山南橋已至竹亭矣。未幾郭山至。然朱氏舊有崇樓。乃同登焉。見道士居室如櫛瓦。參差如魚鱗。上下而烟火之密不減於都衢。良久在軒。至雙山便

行獻酬之禮。頃之暴雨既霽。於是遂出觀醴泉亭。是泉蓋文廟禱。高祖之疾感格天地而湧出者也。有穹碑在泉上。莊誦未半已而五山欲觀南天門。乃策馬而南。見一江自溧陽來。至南天門前西流入大江。而天門對方山。負紫金跨青龍。挾定山真天府也。西過犧牲所而還。至地壇。大雨如注。沾濕衣冠。予曰。今日可謂步過天門帶雨歸矣。

過後湖記

明 計宗道

天下版籍盡載貯。後湖南京戶部官率歲一往磨勘。正德壬申秋。予叨職寄斯役。自八月至十月始訖事。

凡過湖必出太平門命舟行可七八里許一望渺漫
光映上下微風播揚文漪聿興蕩漾烟波之上莫不
情暢神爽若游仙焉余閒立四顧其差莪霄漢之表
王氣鬱葱而峙乎東南者鍾山也疊連如屏如幃在
西北者幕府山也巒嶺偃蹇盤伏於地而松森其上
者覆舟山也挺拔而凸出城頭殿閣參差浮屠聳空
者鷄鳴山也山東西一帶列如懸榜者世傳臺城也
峻嶒冒水而出者島嶼也傍視三法司隱隱錯落雲
水之湄重崗疊阜遙連於其外巋然而鸞鳳峙騰然
而蛟龍走矣其中遠近芳洲相聚如五星紅紫烟花

畢絢如匹錦鷗鷺鳧鴻載飛載鳴鱗鱗鯉鯉以潛以
泳則已目飫而心怡矣忽驚風暴作洪濤春撞篙人
惶懼拏舟艤岸而行經敗荷間香氣猶襲人浮藻亂
荇牽舟綴楫已乃引入曲渚兩岸蒼蔚須臾抵小陂
遂捨舟以陟馬命隸剪荆分莽排霧穿雲逡巡而進
見數處頽垣廢址意前朝遺跡令人慨嘆而叢林蒙
翳追探前路尚空衆亦憊焉或藉草坐茵箕踞少憩
復進望一高丘隸指曰此相傳郭仙墩也衆狙我以
上四圍樹林蔽日復下故道向新建籍庫過石橋延
佇其上騁望雲水茫茫清飈颯颯遂相與携手入舊

庫之洲躡齊而升玄武廳則黃門趙君惟賢已先渡見予輩殊訝既而聞述所遇則又曰是何奇也予往返數矣而未有若諸君所遇者眾亦相與慰喜以為非因風之故則誰使之一探此奇哉凡以公事至及暮而歸則見日光射水晚霞相蕩回視湖上諸宇在蒼烟杳靄間不啻蓬萊閬苑然豈不信為勝地哉昔歐文忠公以金陵錢塘山川人物之盛各為一都會錢塘莫美於西湖金陵莫美於後湖固游冶之所趨也我皇祖奮出江表收天下版籍建庫而儲之于此特設科部官司之禁非公遣不得至則凡好游者雖慕幽遐瑰瑋之觀無所可及而吾儕今獲因公而至而又探奇於無心之會豈非至幸哉

金陵諸山圖考

明 陳沂

唐志稱東南名山衡廬茅蔣金陵有二焉蔣山故名鍾山實都邑之鎮武侯所謂鍾山龍盤是也宋周應合山川序云鍾山之左白攝山臨沂雉亭衡陽以達於東又東為白山大城雲穴武岡以達于東南又南為土山張山青龍石碗天印彭城鴈門竹堂以達于南又南為聚寶戚家梓桐紫巖夏侯天闕以達于西南綿亘至三山而止於大江所謂龍蟠之勢也鍾山

之右近之爲覆舟鷄籠在宮城之後。又北爲直瀆大壯觀四望以達于西北。又西北爲幙府盧龍馬鞍以達于西。是爲石頭城亦止于江。所謂虎踞之形也。然考其山之遠近地之連脉亦少有不合者。蓋東南之山關城重抱山勢連屬不可一一次序言之。且古之江水自三山東入沿陰山石子岡北流以致于石頭。又自石頭沿馬鞍四望盧龍幕府東折至於觀音。又由臨沂攝山直抵京口二百餘里。山勢不絕浮江而觀之。三山據于西南石頭據于西北秦淮中出乃天限之門戶也。今江水西流沙洲曠邈馬鞍鳳臺爲民形勢之大者焉。

金陵諸水圖考

明 陳沂

居曰削而陰山則陶冶爲澤漸不可尋矣。此則圖其形勢之大者焉。
金陵在大江東南自慈姥山至下蜀渡古稱天塹巨浸此江之境也。秦鑿淮吳鑿青溪運瀆揚吳鑿城濠。宋鑿護龍河宋元鑿新河國朝開御河城濠。今諸水交錯互流支脈靡辨據經考之自方山之岡壘兩涯北流西入通濟水門南經武定鎮淮飲虹三橋。又西出三山水門沿石城以達於江者秦淮之故道也。自太平城下由潮溝南流入大內又西出竹橋入濠而

絕。又自舊內旁周繞出淮清橋與秦淮合者青溪所
存之一曲也。自斗門橋西北經乾道太平諸橋東連
內橋西連武衛橋者運瀆之故道也。自北門橋東南
至於大中橋截于通濟城內旁內秦淮。又自通濟城
外與秦淮分流繞南經長干橋至於三山水門外與
秦淮復合者楊吳之城濠也。自昇平橋達于上元縣
從至虹橋南接大市橋者護龍河之遺蹟也。自三山
門外達于草鞋夾經江東橋出大城港與陰山運道
合者皆新開河也。東出青龍橋西出白虎橋至栢川
橋入濠者今大內之御河也。若城外落馬澗諸水不

能悉載焉

宋方輿勝覽

昇元寺即瓦棺寺也在城西隅前瞰江面後據崇岡
最爲古跡李主時昇元閣猶在乃梁朝故物高二百
四十丈李白詩所謂日月隱層楹是也今西南隅戒
壇乃是故基南唐將歸我宋數年前昇元寺殿基掘
得古記乃詩識其辭曰若問江南事不憑抱鷄昇寶
位謂李煜丁酉生也走犬出金陵謂王師甲戌渡江
也子建居南極曹彬列柵城南乃子建也安仁秉夜
燈謂潘美恐有伏兵命縱火也東陵驕小女騎虎渡

河水錢俶以戊寅年入朝盡獻浙西之地騎虎之謂也。瓦棺寺之名起自西晉長興年中長沙城河陸地生青蓮兩朶民間聞之官司掘得一瓦棺開見一僧形貌儼然其花從舌根頂顱生出詢及父老父老曰昔有一僧不說姓名平生誦法華經萬餘部臨終遺言曰以瓦棺葬之此地所司具奏朝廷乃賜建蓮華寺五代兵火焚之李白登瓦棺閣極眺金陵詩鍾山對北戶淮水入南榮漫漫雨花落嘈嘈天樂鳴兩廊振法鼓四角吟風箏杳出霄漢上仰攀日月行山空羈氣滅地古塞陰生寥廓雲漢晚蒼茫宮觀平門餘

閻闔寺樓識鳳凰名雷作百山動神扶萬拱傾靈光何足貴長此鎮吳京棲霞寺在攝山齊明僧紹故宅也仁廟朝嘗賜金寶方牌熙寧間取寄華藏寺中石佛額有玻璃珠後墜地因置閣盛之大觀中爲權要取去米芾嘗以詩紀其事寺今有唐高宗陳尚書令江總碑沈傳師齋疏及沈傳師徐鉉題名按陳軒金陵集劉長卿顧况李紳皮日休韓熙載徐鉉權德輿皆有詩德輿詩畧云縈紆松路深繚繞雲山曲重樓回木杪古像鑿巖腹皆山中景也三茅觀在句容南五十里晉茅君得道於此九域志即三十六洞天之一

第八洞金壇華陽之洞天山中有十五觀又元符宮
石刻云真宗嘗遣左璫詣茅山祈嗣遇異人言王真
人已降生於宋朝璫問何人答曰古燧人氏而章懿
皇后亦夢羽衣數百人從一真人來託生及生宮中
火光燭天。

八功德水記

宋

梅攀上元縣知縣

水在蔣山悟真庵後梁天監中始得名有胡僧曇隱
飛錫寓止修行忽一龐眉叟相謂曰予山龍也知師
渴飲功德池措之無難矣人與口滅一沼沸成深僅
盈尋廣可倍丈浪井不鑿醴泉無源水旱若初澄撓

一色厥後西僧繼至云本域八池一已訾矣此味大
較相類豈非竭彼盈此乎一清二冷三香四柔五甘
六淨七不饑八蠲痾又其効也夫姜詩孝聞獲淵開
而鯉躍貳師誠至因劍刺以流飛義有激而相求物
何速而不應向匪兼濟則為怪力是泉也方外淨因
寰中美利矧其靈者安可忽諸世故流離滋液長在
惜其風雨不庇荆蕪四侵寂寥山阿孰為起廢史館
學士蘭陵蕭公貫以已俸作亭甃板石八自南康購
至楹柱四下東府所成鑿厓以審曲匱圭以端術奢
不至侈歸然獨存仍練僧結廬於前以掌之庶幾便

民汲息客游非有徼於安福也

琅山記 在通州

通之山有五而狼山為最奇又最中東為刀刃山又東為軍山西為塔山又西為馬鞍山左右若翼而軍山在水一方狼山之名謂以形似或謂有白狼據焉後以泗州佛法厭勝去之蓋誕漫無稽也宋淳化中邑令楊鈞上書改狼為琅云 國朝勅建江海神祠在其巔正德七年殲劉賊於此大學士王鏊有江淮平亂碑在祠中 高皇帝御書拜米芾書第一山三大字在狼山之陽頂立浮屠五級名支雲塔遠可望

數百里塔後為僧伽殿塔前即江海神祠祠前為萃

景樓

州同舒纓建有賦

樓前為土地祠祠前東折為振衣亭

由振衣而東為蔡竹山房今為四賢祠祠內有三辰

軒光風霽月二亭由祠而東為半山亭楹間顏以山

腰官閣作狼山游者多飲於此又東南稍下為少憇

亭亭邊有石浮屠七級而小又東南迤邐而下有栖

雲閣閣前為釋伽殿即廣教禪寺西殿為輪藏東殿

為慈悲前殿為金剛前殿沉於水新者四楹宏敞偉

麗知州林公題為江海大觀自支雲塔至此皆林公

修建自為記俯臨大江忽條萬狀雲帆雪浪四時且

暮風雨晴晦。攷觀異日登高。遐覽奇勝。益出秋濤動地。何殊廣陵。故知枚生賦七發。倘令睹此。不無神助。南望虞山。縹緲抹黛。福陶銅官。諸峰隱約。吞吐浮青。偃翠出沒。有無烟靄。蒼茫之際。漁舟賈艇。映帶月日。飛鳧翔鶴。遠勢盤空。而海門東去。浩淼奔騰。與天無際。信宇宙之大觀。而剩水殘峰。曾不一瞬。故古今騷雅篇章。甚富。銓其合作者。載焉。而山之陰。多巉崿峭壁。怪巘奇岫。如蒼龍蜿蜒。骨燦然。霞蔚高者數十仞。若屏列春華。障橫秋爽。而下有千人洞。鵜鵠巖。又有紫石巖。海月巖。巖下有觀音大士院者。二石上有宋時

題名。爲提刑薛球太守。臧師顏。下有名盤醒石。北去有寶陀石。俱有題名。去東數十仞。有夕陽洞。深丈許。廣如之。亦有題名。麓下有伏龜田。形實肖似。山之高。以丈計者五十三。而週迴幾十倍。舊記謂秦始皇渡海觀日出。有神人鞭石處。卽此。甚者引杜子美齊郭狼山詩。謂爲證。殆痴人前說夢邪。今皆削去。山之陽有獅子石。有松岡。刀刃山。一名劍迹山。俗亦謂始皇淬劍於此。故名。未必然也。高二十九丈。而週迴丈者四百七十二。故有磨劍石。今墜於江。東南有雙人峰。下有燕子洞。山南有獺魚洞。西南有淡竹灘。東南最

高峻處有老烏巖鷹隼多穴於是軍山隔江數里週
九里十三步高過劍迹六丈亦謂始皇渡浙江水波
惡從狹中渡此揚子江最濶處駐軍何爲此說可一
笑而破下有燕真人煉丹臺又有真人洞昔桃花萬
樹爲桃花峪乃今尚餘數十株懸崖上有白雲洞雲
興則雨雲散則霽下有白雲泉甚甘冽而椒嘴石者
在山麓之東北迤邐長數十丈潮長落爲出沒夜靜
月明傳聞有笙簫聲評者謂縣崖削壁大海長江空
曠幽寂不減金焦而山之北有山茶灣塔山俗名黃
泥山高丈者十七而二百九十丈之週也上有浮屠

遺址下有仙女洞一名穿江洞昔有一老女子從龍
舒來久之乃仙去

孫昌齡曰白狼去後桑田變仙女昇來洞府開

西下有通

濟閘石上字刻猶存元時海運故道也洞之東有望
姑峰高可六七仞下有沉鴈灣馬鞍山高同塔山而
週倍之亦以形似俗謂隋煬帝征遼時放馬處惟揚
志又云帝自將擊高麗恐是一事上有積翠峰在元
君祠前南去州治十八里北去三里有鍾秀山土築
竹樹幽勝佛廬梵音游者稱宜東十五里北七十里
各有土山培塿耳而東山戴青山觀音山韓童山皆
土築皆在海門今多沉於海

志又云帝自耕

農詩之亦以沃以谷

故舉高河六十

齊聞谷上字候

管來入之

畫世下

田變山女具

新昌鎮

白射

去射

案

西

下

有

處

畫

世

下

有

山

女

